

Uunga siunnersuut: Kommunit Namminersorlutillu Oqartussat missingersuutaat naatsorsuutaallu pillugit Inatsisartut Inatsisaata allanngortinneqarnissaa pillugu Inatsisartut inatsisaat nr. xx, xx. xxx 2018-imeersoq. (Piffissaq ungasinnerusoq eqqarsaatigalugu aningaasaliissuteqarnissamut Aningaasaateqarfimmut isertitassanut tunngavissat annertusineqarnerat, innersuussutip naqqiissuteqarfigineqarnera, pisortat ataatsimoorussamik IT atorlugu aaqqiissuussinerat aamma missingersuutit oqimaaqatigiinnerat pillugu §§ 2-5-imik atorunnaarsitsigallartarneq)
Aningaasaqarnermut Naalakkersuisumit saqqummiunneqartoq

pillugu

Aningaasaqarnermut Akileraartarnermullu Ataatsimiititaliap

siunnersuutip aappassaaneernejarneranut

ISUMALIUTISSIISSUTAA

Ataatsimiititaliap suliarinninnermini ilaasortarai:

Inatsisartunut ilaasortaq Karl Kristian Kruse, Siumut, siulittaasup
Inatsisartunut ilaasortaq Sara Olsvig, Inuit Ataqaatigiit, siulittaasup tullia
Inatsisartunut ilaasortaq Niels Thomsen, Demokraatit
Inatsisartunut ilaasortaq Jess Svane, Siumut
Inatsisartunut ilaasortaq Aqqaluaq B. Egede, Inuit Ataqaatigiit
Inatsisartunut ilaasortaq Tillie Martinussen, Suleqatigiissitsisut
Inatsisartunut ilaasortaq Mala Høy Kuko, Siumut

UKA 2018-imi siullermeerinninnerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Inatsisip (UPA 2016/20) 2016-imi upernaakkut ataatsimiinnermi akuersissutigineqarnerata kingorna misilittagaalersut tunngavigalugit missingersuusionermit inatsisip naleqqussarneqarnissaa allannguutissatut inatsimmut matumunnga siunertaasoq Naalakkersuisut paasissutissiissutigaat.

Siunnersuummi § 1, nr. 1 pillugu:

Maleruagassat atuuttut malillugit ilaatigut aatsitassarsiornermi misissueqqaarnermik, aatsitassarsiorluni misissuinermik aamma piaanermik suliaqarnermit akileraarutinit A-nit

nunatta karsiani isertitat Piffissaq ungasinnerusoq eqqarsaatigalugu aningaasaliissuteqarnissamut Aningaasaateqarfimmut tutsinneqartussaapput. Tassani pineqarput inuit qaammatini siulliini 6-ini kingullerni nunatsinni maani kommunimut akileraartussaataasimanngitsut aammalu ilanngaasiinnginnermi akileraarutinut aaqqissuussinermik taaneqartartumi pineqartunut ilaatinneqartut pillugit akileraarutit, takuuk aningaasarsianit akileraarutit pillugit Inatsisartut Inatsisaanni § 72 b.

Tamatuma saniatigut aningaasarsianit akileraarutit pillugit Inatsisartut inatsisaanni ilanngaasiinnginnermi akileraarutinut aaqqissuussinermi ilaatinneqarput inuit illoqarfiit aamma nunaqarfiit pioreersut avataanni sanaartugassanik pilersaarusiormik suliassanut, illuliornermik sanaartormillu suliassanut kiisalu innaallagialersuinnermut ikkussuinnermullu suliassanut atatillugu suliaqartut pillugit akileraarutit A-t, takuuk aningaasarsianit akileraarutit pillugit Inatsisartut inatsisaanni § 72 a. Aalajangersagaq, taamani Alcoamut tunngatillugu suliniummut tunngatinneqartoq, maannamut atorneqarsimanngilaq. Namminersorlutik Oqartussat sinnerlugit mittarfiliormerit ilanngullugit Aningaasarsianit akileraarutit pillugit Inatsisartut inatsisaata allanngortinneqarnera pillugu Inatsisartut inatsisaanni nr. 48, 23. november 2017-imeersumi § 72 a-p atuuffissaata annertusineqarnissaa Inatsisartunit akuerineqarpoq.

Aningaasarsianit akileraarutit pillugit Inatsisartut inatsisaanni § 72 b malillugu ilanngaasiinnginnermi akileraarutit Piffissaq ungasinnerusoq eqqarsaatigalugu aningaasaliissuteqarnissamut Aningaasaateqarfimmut tutsinneqartarnissaasa aalajangiunneqarnera eqqarsaatigalugu, tamatuma ilanngaasiinnginnermi akileraarutinut § 72 a-mi pineqartunut aamma atuunnissaata siunnersuutiginnissaa eqqortuusorineqarpoq. Tamatumani aalajangersakkanut marlunnut taakkununga tunngatillugu ilanngaasiinnginnermi akileraarutinit iluanaarutit immikkut ittutut isigineqartariaqarnerat aamma pingaartinneqarpoq.

Siunnersuummi § 1, nr. 2 pillugu:

Inatsimmi atuuttumi ullumikkut Inatsisartut inatsisaanni § 21, imm. 3-mut innersuussisoqarpoq. Innersuussut taanna eqqunngilaq siunnersuutigineqarporlu § 21, imm. 4-mut innersuussinermut iluarsineqassasoq. Siunnersuummik ilusilersuinerup iluarsineqarnera tamatumani kisimi pineqarpoq.

Siunnersuummi § 1, nr. 3 pillugu:

Inatsisartunut qinersinerup nassatarisaanik upernaakkut ataatsimiittoqannginnissaa § 32, imm. 3-tut nutaatut siunnersuummi siunnerfigineqarput. Taama pisoqartillugu Naalackersuisunngorlaat Kalaallit Nunaata Aningaasaqarnera pillugu nalunaarummik, misissueqqissaarnerit il.il. aallaavigalugit Naalackersuisut nutaat aningaasaqarnikkut anguniagaannik malitassiorfiusumik, saqqummiussinissaq angumerisinnaassanngilaat. Taamaattumillu nalunaarutip taamaattup Kalaallit Nunaanni maannakkut aningaasaqarnikkut

inissisimaneq pillugu allagangorlugu Inatsisartunut ilisimatitsissummik taarserneqarnissaanik Naalakkersuisut aalajangersinnaanerit anguniarneqarpoq.

Siunnersuummi § 1, nr. 4 aamma 5 pillugit:

Pisortat IT atorlugu aaqqissuussinerannik pilersitsinissaq, siulersuinissaq il.il. pillugit nalunaarusiornissamut Naalakkersuisut piginnaatinneqarnissaat § 46 a aqutigalugu siunnersuutigineqarpoq. Taamaattoqassappat pisortat ataatsimoorussamik IT atorlugu periaasiannut atatillugu pisiortorneq, ingerlatsineq ineriartortitsinerlu aaqqissuussinerup tamatuma isumagisussaassavaa. Piginnaatitsissummi ilaatigut pineqarpoq siulersuinerup tunngasut, IT atorlugu periaatsit pisortanit ataatsimoorussat, taamaalillunilu aaqqissuussinermit akisussaaffigineqartutut isigineqarnissaannut suut piumasaqaataanersut, aaqqissuussaannermit aningaasartuutit kommunit Namminersorlutillu Oqartussat akornanni qanoq agguataarneqassanersut, kommunit Namminersorlutillu Oqartussat saniatigut aaqqissuussaaneq allat suliassaataannik isumaginissinnaanersaq il.il. pillugit maleruagassiorsinnaaneq.

Suliassaqarfimmi tassani pisortani oqartussat IT atorlugu periaatsinik assigiinnik atuinissaannut periarfissat pitsanngorsarnissaat siunertaralugu IT atorlugu periaatsit pisortani ataatsimoorussat sorliit kommuninit tamanit aammalu Namminersorlutik Oqartussanit atorineqartussaataitaanerannik aalajangiinissamut Naalakkersuisut piginnaatinneqassasut siunnersuutigineqarpoq.

Taamaalillunilu Naalakkersuisut taama aalajangiisimangippata IT atorlugu periaaseq pisortat IT atorlugu aaqqissuussinerannit pisarineqartumik, ingerlanneqartumik ineriartortinneqartumillu atuerusunnerlutik kommunit Namminersorlutik Oqartussalluunniit namminneq aalajangersinnaavaat.

Kiisalu kommunit Namminersorlutillu Oqartussat akornanni sukumiisumik oqaloqatigiinnerup kingorna maleruagassat imarisaat aalajangersarneqassasut Naalakkersuisunit paasissutissiissutigineqarpoq.

Siunnersuummi § 1, nr. 6 pillugu:

Inatsisartut inatsisaanni atuuttumi § 2-imi ilaatigut allassimavoq ukiuni sisamani piffissap missingersuusiorfiusup ingerlanerani kommunini aamma Namminersorlutik Oqartussani pisortat aningaasaataanni ataatsimoortuni missingersuutitigut inissisimaneq tamarmiisoq oqimaaqatigiissasooq imaluunniit sinneqartoorfiussasooq. Tamatuma saniatigut aalajangersakkap imarai ingerlatsinerup aningaasartuutit annerpaamik qaffakkiartornissaasa annertussusissaa aammalu isertitat tamarmiisut minnerpaamik 7 %-ii sanaartornermut immikkoortinneqarnissaat pillugit maleruagassat.

Missingersuutini inissisimanerup naatsorsorneqartarnera pillugu aalajangersagaq maannatut iluseqartoq immikkoortunut ataasiakkaanut tunngatillugu naleqqutinngitsoq paasinarsisimavoq. Tamatumunnga ilaatigut pissutaavoq:

- Inatsisartut inatsisaanni aalajangersakkani kommunit aamma Namminersorlutik Oqartussat akornanni suliassanik nuussisarnerit amerlisimanerisa naammattumik annertussusilimmik sillimaffigineqarsimannginnera. Tamatuma kommunit aamma Namminersorlutik Oqartussat missingersuutit minnerpaamik 7 %-iannik sanaartugassani aningaasaliinernut atuinissaat pillugu piumasaqaatip ingerlaavartumik naatsorsortarnissaa aammalu malinneqarnerata nalilersorneqarnissaa ajornakusuulersippaa.
- Kommuni avinneqarnera 1. januar 2018 atuutilersoq pissutigalugu Kommuni Qeqertalimmut aamma Avannaata Kommunianut missingersuutini inissisimanerup kingumoortumik naatsorsorneqarsinnaasimannginnerata Inatsisartut inatsisaanni aalajangersakkani sillimaffigineqarsimannginnera. Tamatuma peqatigisaanik Qaasuitsup Kommuniata naatsorsuutai aallaavigalugit kommuninut taakkununnga missingersuutini inissisimaneq naatsorsorneqassappat, tamatuma kingunerisaanik kommunit nutaat siunissami atugassinneqarnissaat Qaasuitsup Kommuniani aalajangiisimanernit sunnerneqartussaavoq.
- Inatsisartut inatsisaata atuutilernissaa sioqqullugu ukioq naatsorsuusiortifusoq ilaasusaatinneqaqqunagu missingersuutini inissisimanerup kingumoortumik naatsorsorneqarnerani Inatsisartut inatsisaata atuutsikkiartuarneqarnissaanik pisariaqartitsinerup naammattumik eqqarsaatigineqarsimannginnera.

Tamanna tunngavigalugu qulaajaanermik suliaqarnek aallartinneqarpoq, tamatumani siunertarineqarluni maleruagassat allanngortinneqarnissaannik pisariaqartitsisoqarneranik paasinarsisitsinissaq, taamaattoqassappallu maleruagassat taamaattut oqaasertassaattut siunnersuummik saqqummiussinissaq. Maleruagassanik allanngortitsinermi qulakkeerneqassaaq Namminersorlutik Oqartussat aningaasaataasa ileqqaakkat sanaartugassanut nutaanut anginernullu il.il. naleqquttumik aningaasaliissutitut tunngavigineqarsinnaanerit pillugu naleqquttumik aalajangiinissamat taakku aporfiumnginnissaat. Suliaqarnek 2019-ip imaluunniit 2020-ip ingerlanerani naammassissasoq naatsorsuutigineqarpoq.

Taamaalillunilu siunnersuutigineqarpoq missingersuusiortnermut inatsimmi §§-it 2-5 31. december 2021-ip tungaanut atuukkunnaarsinneqassasut, tamatumani ajornartorsiut siuliani taaneqartoq taanna sioqqullugu paasinarsinneqassagaluarpat maleruagassat nalunaarut aqputigalugu ulloq taanna sioqqullugu atuutsinneqalersinnaanerit periarfissillugu.

Siunnersuutip Inatsisartunit siullermeerneqarnera

Aaqqissuussinerup taamaattup ilusilersorneqarnerani kommunit akuutinneqarnissaat tunngavissaatillugu pisortat IT atorlugu aaqqissuussinerannik pilersitsinissaq

pitsaaquteqarsinnaasoq siullermeerinninnermi isumaqatigiissutigineqarpoq. Siullermeerinninnerup nalaani 2018-imi missingersuutitigut inissisimaneq pillugu suliap ataatsimiititaliamit suli suliarineqarnera ilaatigut eqqarsaatigalugu missingersuutit oqimaaqatigiinnissaat pillugu maleruagassat atuukkunnaarsinneqarallarnerat pillugu maleruagassat ataatsimiititaliamut suliassanngorlugit innersuunneqarput.

Tusarniaaneq

Siunnersuut piffissami 8. junimit 6. juli 2018-imut tusarniaassutigineqartoq Naalakkersuisut siunnersuummut nassuiaatini paasissutissiissutigaa.

Pisortat ataatsimoorussamik IT atorlugu aaqqissuussinerannik pilersitsinissap pilersaarusiorneqarnerani kommunit akuutinneqartariaqartut Kommune Kujallermit, Kommune Qeqertalimmit aammalu Kommuneqarfik Sermersuumit tikkuarneqartoq ataatsimiititaliamit immikkut maluginiarneqarpoq.

Aaqqissuussaaneq akuusut tamarmik isumaqatigiissuteqarnerat tunngavigalugu pilersinneqartariaqartoq Naalakkersuisut tassunga oqaatigigaat ataatsimiititaliamit maluginiarneqarpoq. Isumaqatigiissut taanna pisariaqarnera malillugu nalunaarummik suliaqarnermi tunngavigineqassaaq. Sulinermi tassani kommunit akuutinneqassapput, soorluttaaq nalunaarut tusarniutigineqarumaartoq. Naalakkersuisut oqaaseqaataat kommunit akuutinneqarnissaannik akuersaarnertut ataatsimiititaliamit paasineqarpoq.

Ataatsimiititaliap siunnersuummik suliarinninnera

Missingersuusiornermut inatsimmi missingersuutit inissisimanerat pillugu aalajangersakkat 2018-imut tunngatillugu saneqqunneqarnissaannik Naalakkersuisut ataatsimiititaliamut qinnuteqartariaqarsimanerat Aningaasaqarnermut Akileraartarnermullu Ataatsimiititaliap aningaasaliissuteqarnissamik suliaani nr. 798-imi ataatsimiititaliamit isummerfigineqartariaqarsimammat siunnersuummi § 1, nr. 6-imut immikkut tunngatillugu oqaatigineqassaaq. Tassunga atatillugu maleruagassanik, iliuseqarnissamut periarfissiisunik, pilersitsinissaq Naalakkersuisunit sulissutigineqarmat ataatsimiititaliamit pingaartinneqarpoq. Taamatut anguniagaqarnerup ilaatut siunnersuummi § 1, nr. 6 ataatsimiititaliamit isigineqarpoq, tamannalu ima paasineqassalluni; maleruagassanik atorunnaarsitsigallarneq missingersuutit inissisimanerat pillugu missingersuutinut inatsimmi aalajangersakkat siunissami qanoq naapertuunnerpaamik ilusilersorneqarsinnaanerannik qulaajaanissamut Naalakkersuisunut piffissaliisoq. Tassunga atatillugu ataatsimiititaliamit oqaatigineqassaaq maleruagassat siunnersuutikkut atorunnaarsinneqartut siunertarimmassuk nuna tamakkerlugu minnerunngitsumillu kommuninut aningaasaqarnerup patajaatsuunissaanut tapertaanissaq, taamaattumillu suliassap sallinngortinneqarnissaanik kiisalu missingersuutinut inatsisip

kissaatigineqartut naleqqussarneqarneranik ataatsimiititaliamut ingerlaavartumik ilisimatitsisarnissamik Naalakkersuisut ataatsimiititaliamit qinnuigineqassapput. Missingersuusiornermut inatsisip 2017-imi akuerineqarnerata kingorna inatsimmi aalajangersakkat atorunnaarsinneqartariaqarsimanerat tunngaviumik isigalugu pitsaanngitsoq ataatsimiititaliaq isumaqarpoq. Tamanna inatsimmik suliarinninnermi peqqissaarussisimanginnermut takussutissaasinnaavoq, taamaattumillu siunnersuut una maligassiuisussaangitsutut ataasiartumik pisutut isigineqassasoq ataatsimiititaliamit erseqqissarneqassaaq.

Ataatsimiititaliami ikinnerussuteqartut Inuit Ataqtigiit aamma Suleqtigiissitsisut ilaasortaataat, siunnersuut pillugu ima oqaaseqaateqarumapput:

”Aningaasarsianit akileraarutit pillugit Inatsisartut inatsisaanni § 72 b naapertorlugu ilanngaasiinnginnermi akileraarutit Piffissaq ungasinnerusoq eqqarsaatigalugu aningaasaliissuteqarnissamut Aningaasaateqarfimmut nuunneqarsinnaanerannik piginnaatitsissutip aningaasarsianit akileraarutit pillugit Inatsisartut inatsisaanni § 72 a naapertorlugu ilanngaasiinnginnermi akileraarutinut aamma atuuttussanngortinnerata kingunerisassai Naalakkersuisunit naammattumik erseqqissusilimmik nassuiaatigineqarsimangitsut Inuit Ataqtigiit isumaqarput. Aammalu inatsisissatut siunnersuummik matuminnga suliarinninnermut atatillugu inatsimmi allannguinerup mittarfiliornissanut attuumassuteqannginneranik Naalakkersuisut oqarnerat Inuit Ataqtigiinnit isornartinneqarpoq, siulianimi ersarsilluinnartumik allassimavoq Namminersorlutik Oqartussat sinnerlugit mittarfiliornermi immikkut ittumik isertitat pineqartut.

Mittarfiliornissat, tamarmik illoqarfimmut qanittumiittussat, pissutsinut suliniutinut angisuunut, illoqarfimmut qanittumiittussaangitsutut eqqarsaatigineqartunut, atuuttunut sanillersuunneqarnerat eqqarsaatigilluagaangitsoq Inuit Ataqtigiit isumaqarput.

Allannguutissatut siunnersuutigineqartut sinneri Inuit Ataqtigiinnit taparserneqarsinnaapput aammalu siuliani allassimasutut isumakuluutiginnikkaluarlutik siunnersuut tapersissallugu”

Siunnersuutip aningaasaqarnikkut kingunerisassai

Piffissaq ungasinnerusoq eqqarsaatigalugu aningaasaliissuteqarnissamut Aningaasaateqarfik missingersuusiaatsimi naatsorsuusiaatsimilu aningaasaateqarfiusoq, nunatta karsianut ilaasoq Naalakkersuisut paasissutissiissutigaat. Aningaasaateqarfiup isertitasaanut tunngavissat annertusineqarnerat taamaalilluni nunatta karsiata naatsorsuutaasa inernerinut pingaaruteqanngilaq.

Pisortat ataatsimoorussamik IT atorlugu periaasiannut atatillugu pisiortorneq, ingerlatsineq ineriartortitsinerlu pillugit aqqqissuussinermik pilersitsinissaq pillugu maleruagassiornissamut

piginnaatitsissutip aningaasartuuteqarnerulernermik aallaaviatigut kinguneqarnissaa naatsorsuutigineqanngilaq. Taamaattoqassappat pilersitsineq aningaasaliissutinut killiliussat pioreersut iluanni nuussinikkut pissaaq aammalu ilaatigut aningaasanut inatsimmi kontomik pingaarnermik nutaamik pilersitsinissamik pissutissaqalersitsissasoq naatsorsuutigineqartariaqarluni. Pilersitsinermi Namminersorlutik Oqartussanut aningaasaqarnikkut sunniutaasussat erseqqinnersut Aningaasaqarnermut Akileraartarnermullu Ataatsimiititaliamut saqqummiunneqassapput aammalu aningaasanut inatsisissani ilanngunneqassallutik. Taamaaqataanik kommunalbestyrelsit taakkualu aningaasaqarnermut ataatsimiititaliaat, kommuninut ataasiakkaanut aningaasaqarnikkut sunniutaasussat pillugit, akuutinneqassapput.

Ataatsimiititaliap inassuteqaatai

Siunnersuut **akuerineqassasoq ataatsimiititaliap isumaqatigiittup** inassutigaa.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.

Karl Kristian Kruse
Siulittaasup

Sara Olsvig
Siulittaasup tullia

Niels Thomsen

Jess Svane

Aqqaluaq B. Egede

Tillie Martinudssen

Mala Høy Kuko

